

DE RADICE  
**GINSENG VEL NINSI.**


---

DISSERTATIO INAUGURALIS,  
QUAM  
CONSENTIENTE AMPLISSIMO MEDI-  
CORUM ORDINE

IN  
UNIVERSITATE LITERARUM CAESAREA  
DORPATENSI,  
UT GRADUM  
DOCTORIS MEDICINAE

RITE ASSEQUATUR  
LOCO CONSUETO PUBLICE DEFENSURUS  
CONSCRIPSIT

**Joannes Schult;** SIBELIENSIS  
CURONUS. ACADEM:  
DORPAT:



---

DORPATI LIVONORUM.

TYPIS J. C. SCHUENMANNI,  
TYPOGRAPHI ACADEMICI.  
MDCCCXXXVI.

V I R O

I M P R I M A T U R

haec dissertatio, ea tamen conditione, ut simulac typis  
fuerit excusa, quinque ejus exempla collegio libris ex-  
plorandis constituto tradantur.

Dorpati Liv. die 16. m. Maii 1836.

Dr. P. U. WALTER,  
Ord. Med. h. t. Decanus.

INCLYTO, CLARISSIMO, ILLUSTRIS-  
SIMO, LIBERO BARONI ET EQUITI,

CAROLO EVALDO

AB

O S T E N - S A C K E N ,

DOMINO HEREDITARIO POSSESSIONUM: BATHEN  
GULBEN ET SCHMAISEN etc. etc. etc.

PATRONO SUMME MAXIMEQUE DEVENE-  
RANDO, STUDIORUM FAUTORI SUORUM,

P 17446

L. B.

HAS PRIMITIAS

PIO GRATIQUE ANIMO

O F F E R T

A U C T O R .

Cum non dubitem fore plerosque quibus inauditum videatur, ex magno materiae medicae thesauro medicamentum me elegisse de quo tractarem, cuius in libris plerisque de pharmacologia conscriptis ne nomen quidem inveniatur, pauca excusationis loco praemittere cogor.

Primum enim, ut meam sententiam sincere profitear, tiro de scribendi themate tam anxie sollicitus esse non debet, cum raro specimine suo magnum incrementum literis afferat; quapropter, num de radice Ginseng aut de Opio scripserim ad idem recurrit. Dein credebam, diligens examen radicis hujus in Europa tam raro tentatae et nihilo secus tam multum laudatae, non sine fructu fore. Tandem infitias iri nequit,

radicis hujus historiam satis memorabilem esse. Quod consilium de radice hac scribendi „ephemeridibus pharmaceuticis centralibus“ probatum video, quae certiora de radice Ginseng testimonia quaeviis pergrata fore fatentur<sup>1)</sup>.

Ut autem veritati debitus tribuatur honos, gratias publice ago praceptorum et fautori theo Erdmanno ad cineres usque venerando, quod exemplum radicis Ginseng et librum mecum communicaverit veterem<sup>2)</sup>, cui multa cognitum maxime digna de themate meo relata debeo.

---

1) Pharmaceutisches Centralblatt vom May 1834.  
P. 557.

2) Icones variarum plantarum Jacobo Breynio desinatae cura Joannis Breynii M. D. Gedani 1739.

---

## C A P U T I.

Libri saeculo decimo septimo et initio sequentis conscripti multa exhibent medicamina et simplicia et composita, quorum vis miraculosa habebatur, quod ex miris nominibus, quae ipsis indita sunt, facile perspicitur. Arcana autem et Panaceae a medicis artis ignariis, Theophrasto Paracelso Bombasto similibus, a monachis fraudulosis et vetulis astutis majus superstitioni et erroribus apèruerunt ostium: pilulas enim et essentias miraculosas venditabant, amuleta et signa magica adhibebant; Cagliostro elixirum vitae, a se inventum, praedicabat, Mesmer magnetismum laudibus extollebat, et Dr. Graham „celestial bed“ suum commendabat. Quae medicamina saepissime ex aqua tincta vel offis panis argento inductis constabant, et non solum pericula ferebant, quae ex celeri et scita medici ope neglecta oriri possunt, sed etiam uti ex. gr. pilulae quae vocantur albas con-

tra febrem datae, majora saepe damna aerotis parabant. Incrementis autem artis medicae aevum nostrum edoctum est, ejusmodi remedia universalia non extare, cum diversa indoles, variae morborum sedes, corporis habitus maxime dissimilis, sexus et aetas inaequales varia medicamina in morbis curandis exigant. Quis enim medicus, artis suae gnarus, febres omnes moscho, hydropem quemcunque cantharidibus curaret?

His remediis universalibus radix Ginseng s. Ninsi per plura jan saecula a Sinensibus et Japanis adnumeratur. Nec est, quod miremur hanc rem, cum sol oriens superstitioni magis videatur favere et Sinensium populus ille mysticus, cuius cultura per saecula multa proressa non videatur, quique tam anxie et sollicite vetera tuetur, ad hanc miraculorum superstitionem imprimis propensus sit.

Radix nostra et apud hos et apud nostrates variis nominibus insignitur, quorum plurima Martius collegit (3), qui multorum aliorum exemplum secutus, cum radicem Ginseng et rad. Ninsin diversas putet, utriusque varia nomina refert. Radicem enim Ginseng a Sinensibus Ginsing, Gingzing, Zingin, Gensing, Linchen, Gin-

3) Martius F. W. C. Grundriss der Pharmacognosie. Erlangen 1832. P. 38 et 54.

sem \*) vocari et Schinschen, Schinscheng, Jaensem vel Jaensom, teste Osbeck; a Canadensis autem Oteragweh, a Tartaris Mantcheaux, Orhata i. e. reginam pratorum, a Mongolis Kitipin et ab Iroquaeis Garantougen i. e. hominum crura. Radicis autem Ninsi synonyma refert: Ninzin, Nindsin, Nissji, Dsindsom, Sjusjin et Som apud Sinenses, Soasai apud Tartaros et Sinsom vel Nisi apud Japanos.

Radicis autem Panacis quinquefolii nomen usitatum Ginseng, radicis vero Sii Ninsi nomen Ninsi audit. Quod utrumque nomen ab iis, qui unam tantum radicem statuunt, promiscue usurpat. Ex qua nominis diversitate non immerito quedam ipsius quoque radicis confusio metuenda est, idque eo magis cum teste Thunberg (4) Japoni alias quoque plantas similibus nominibus insigniant, ita ut ex. gr. Sison Canadense ab ipsis Tsuru (Japonice planta) Ninsin et species quaedam Corchori Gensin vocentur.

Radix haecce jam saeculi decimi septi-

\*) Ginsem, Grabero interprete, hominis nativitatem significat, fortasse quia multum ad hanc facit, vel quia corpus humanum roborat et a multis miseriis defendit, vel quia figuram homuncionis quoddammodo praese ferre videtur.

4) Thunberg, C. P. Flora japonica. Lipsiae 1784. P. 119 et 353.

mi initio et quidem Graumüller (5) teste anno 1610 a Batavis in Europam tralata est. Jacobus Breynius an. jam 1643 eam ex Sina accepit. Ad annum tamen 1715 usque perrara in Europa fuit, quo tempore Rev. Pater Lafiteau, interpres formulae christ. apud Iroquoeos eam in Canada detexit inque Franciam misit (6). Ad quaerendam in America hanc radicem patrem Lafiteau epistola commovit, quam Rev. Jartoux anno 1712 die XII April. m. Procuratori generali Missionis in India et Chinam scriperat.

Occasionem hujus rei Patri Jartoux iter praebuit, quod jussu imperatoris Sinensium perficiendae accurate Tatariae orientalis mappae geographicae causa cum sociis iustiterat. Anno enim 1709 in itinere memorato Sinensium imperator agmen decem milium Tatarorum emiserat, pretiosissimae rad. Ginseng pro ipso colligendae gratia. Exente Julio mense in limitibus peninsulae Coreae forte a quibusdam horum Tatarorum hujus radicis collectione occupatorum hanc cum integra planta recentem accepit, et quidem exempla ejus quatuor. Pater Jartoux ob hoc inventum sibi plaudens plantam cum radice accuratissime delineavit et

5) Graumüller, C. F. Handbuch der pharmaceutisch-medie. Botanik., 6ter Band. P. 336.

6) Breynius l. c. P. 50.

descripsit. Quam descriptionem cum figura, determinatione in quo loco reperta esset, enarratione temporis et rationis colligendi, conservandi et utendi viriumque mirabilium, quae ipsi a Sinensibus adscribuntur et quarundam quas ipse expertus est (de qua re postea uberiori locuturi sumus) epistola supra citata continet.

Qua epistola perfecta Pater Lafiteau plantam hanc a Rev. Jartoux delineatam, fortasse ea commotus opinione, quae apud omnes tunc temporis botanicos valebat, in regionibus sub aequali latitudinis geographicae gradu sitis, aequales plantas crescere; — in sylvis Canadensis quæsivit annoque 1716 feliciter invenit. Lafiteau in memoriam ducis Aurelianensem, botanicorum Maeccenatis, plantam hanc Aurelianam Canadensem nominavit (7), quam tamen Vaillant Araliastrum, omnesque recentiores botanici Panax quinquefolium dicunt.

Ante hanc radicem in Canada repertam, radix Ginseng vel Ninsi a Sinensibus et Japanis auro pretiosior habebatur. Geiger (8) ejus unciam 150 florenis, Ludovicii (9) libram 100 uncialibus (Thaler) em-

7) Breynius l. c. P. 51.

8) Geiger, P. L. Handbuch der Pharmacie. Heidelberg 1828, 2ter Band, 2te Abtheilung, p. 694.

9) Ludovicii, C. G. Kaufmannslexicon, 4ter Thl, Leipzig 1799. P. 1462.

tas esse, narrant. Teste Bohnio (10) Si-nenses eam Japonis afferebant, quibus libram ejusque quartam partem 100 Cobangis vel 600 uncialibus vendebant. Timkowsky (11) narrat, unciae sextantem (золотникъ) rad. Ginseng Manschuricae 280 rubellis, libram igitur 7680 r. venditam esse, quod pretium auri octies decies superat. Thunberg (12) narrat: „dum ego in Japonia versabar libra unica selectae radicis Ninsi constituit 600 imperialibus.“ Si, quod rarissime contingit rad. Ginseng in quatuor divaricatur ramos, ut ita non solum crura sed etiam brachia referat humana, radix haec teste Rumphio a Magnatibus Sinen-sium pro Lare habetur atque colitur.

Quae inaudita pretia Lafiteau invento suo mutavit. Ex urbe Quebec enim (13) in Franciam indeque in Sinam magna hu-jus radicis copia mittebatur, quo factum est, ut libra anno 1748 sex libris gallicis (Fran-ken) emeretur. Aborigines omnes circa urbem Montreal huic radici colligendae operam dabant, adeo ut nullus, uti alias so-lebat, ad messes conficiendas conduci pos-set. Quin timebatur ne radix haec in vi-

10) Bohn, G. C. Waarenlager von Normann be-arb., 1ster Band. Hamburg 1805. P. 675.

11) Goebel, Fr. Pharmaceut. Waarenkunde, forig. von Kunze. P. 22.

12) l. c. P. 118.

13) Graumüller l. c. P. 336.

cinio extirparetur, quae cum antea circa urbem Montreal frequens esset, non am-plius inveniretur. Bohnio teste Batavi a Japanis hujus radicis commercio interdicti sunt.

Sub fine denique saeculi prioris com-mercium hocce prorsus desiit. Rad. Gin-seng ex pharmacologicis libris paullatim evanuit, hujusque aevi medicis fere non nisi ejus nomen notum est.

## C A P U T II.

Ex priore igitur capite certum est, ra-dicem nostram primum quidem ex oriente, dein vero ex occidente in Europam trala-tam esse.

Cuinam generi radix haec in America inventa adnumeranda sit, vix est, quod du-bitemus, cum botanici maximaे autoritatis ex. gr. Linné (14), Michaux (15), Pursh (16), Richard (17), De Candol-

14) Linné, C. Species plantarum. Tom IV. Pars II. P. 1124.

15) Michaux, A. Flora boreali-americana. Parisii 1803. Tom II. P. 256.

16) Pursh, F. Flora Americae septentrionalis. Lon-din. 1814. P. 191.

17) Richard, Achille. Botanique medicale. Paris. 1823. P. 453.

le (18), Hooker (19) multique alii *Panax* quinquefolium matrem dicant. Quam ob causam Martii (20) opinionem posthabentem, plantam, ab Iroquois „Garantogen“ appellatam, a Sio Ninsi originem ducere, cum Martius praeterea et multa alia, quas non recta sint, de radice nostra protulerit.

Radicis autem orientalis origo minus in aprico est, variaeque atque diversae hac de re propositae sunt sententiae. Quas trifariam disponere licet:

I) eorum, qui duas hujus radicis matres statuunt, nempe *Panax quinquefolium*\* et *Sium Ninsi*\*\*). His adensem: Ludoovicum, Geigerum, Kunzium, Martium, Vireyum (21), Neesium ab Esen-

18) De Candolle, P. *Prodromus systematis naturalis regni vegetabilis*. Pars IV. Parisiis 1830. P. 252.

19) Hooker, W. J. *Flora boreali-Americanæ*. London. 1833. Vol. I. P. 273.

20) Martius, I. c. P. 38.

\*) Breynius afferit rad. *Ginseng Japonicam* neutram ut *Sineensem*, ex *Panace quinquefolio*, sed ex alia planta in cognita originem ducere.

\*\*) Rehmann et Kumensky *Orchidem Ninam Rad. Ninsi matrem putant, tamen Panax quinquefolium describunt.*

(21) Virey, J. J. *Histoire naturelle des medicaments etc*. Paris. 1820. P. 219 et 224.

beck (22), et lexicon „Dictionnaire des sciences naturelles“ (23) inscriptum.

II) eorum, qui unam tantum plantam matrem hujus radicis sumunt, utpote Linnaeus, Bohnius, Graumüllerus, Richardus et De Candolle, qui non nisi *Panax quinquefolium* pro matre agnoscunt, nec non Thunbergus qui radicem nostram a Sio Ninsi derivat.

III) eorum sententia, qui solum quidem *Panax quinquefolium* hujus radicis matrem putant, quae tamen plures varietas habeat, ut: Wallich (24), Siebold et Nees ab Esenbeck.

Ut meam qualemcumque sententiam proferam, iis adsentior, qui solum *Panax quinquefolium* matrem habent, et duplice quidem ob causam: primum, quia jam De Candolle observavit, *Sium Ninsi* Thunb. Araliaceis adnumerandum esse, dein quia Sieboldio, qui ipse plures annos in Japano degit, teste, in Japano nulla Umbellifera inveniatur, quae plantae similis sit, quam Kämpfer speciem Sii et matrem

22) Nees von Esenbeck. *Sammlung offic. Pflanzen*. Düsseldorf 1828, 7te Lieferung, Taf. 9. Conspl. 284. und 1ster Suppl. Band. Düsseldorf 1833. Fasc. 5. Tab. 15. Conspl. 69, ubi jam concedit sese in libro priore errorem de hac re commissare.

23) *Dictionnaire des sciences naturelles*. Tom. 18. Paris. 1820. P. 501.

24) *Pharmaceutisches Centralblatt*. P. 353—358. Taf. III.

rad. Ninsi putat, smo potius Kaempferi picturam falsam Panacis iconem videri. Monendum autem est, autores illos, quos primo loco supra nominavi, Kaempferi sententiam amplexos esse, de qua nunc, quam falsa sit, constat. Siebold (25) praeterea monstravit, plantam quae in Japano et Corea inveniatur varietates Panacis quinquefolii esse. Wallich denique in India orientali varietatem tertiam invenit, de qua haec memoratu dignissima refert:

„Als ich 1820 und 1821 in Nipal war, fand ich auf dem Gipfel des Sheopore, eines der höchsten Berge, rings um die Ueberbleibsel einer alten Befestigung eine Pflanze, die ich leicht als eine dem Ginseng nahe verwandte, wo nicht mit demselben identische Art von Panax erkannte. Eine ziemliche Anzahl von Exemplaren wuchs unter dem dichten Schatten der Eichen und Rhododendra, in einem Bezirke von 40—50' im Quadrat. Unsere Bemühungen sie anderswo in Nipal aufzufinden, waren ohne Erfolg. Die Eingeborenen des Landes, denen ich sie zeigte, waren gänzlich ohne Kenntniss derselben. Ich zeigte dem Hofe von Kotmandoo an, dass das Land eine Pflanze besäße, welche unter ihren Chinesischen Nachbaren sehr hoch geschätzt wird, und welche vielleicht das angenehmste Geschenk abgeben mögte, das dem Kaiser von dem Rajah von Nipal bei

25) Pharr. Centralblatt. P. 358.

der je dreijährigen Gesandschaft überschickt werden könnte. Allein die Sache wurde nicht der weitern Untersuchung werth geachtet, entweder weil die Regierung abgeneigt war, eine solche Panacee einem Hofe zu ertheilen, den sie mit eben so viel Furcht als Neid betrachtet, oder indem sie diesem Hofe keinen so hohen Grad von Narrheit zutraute, das Gewicht an Gold für eine unbedeutende Wurzel zu zahlen, die nicht physisch bemerkbare Eigenschaften besitzt.“

Wallich dein, occasione data, plantam suam cum exemplari quodam Panacis quinquefolii Americani comparavit, et animadvertisit discrimina intercedere inter utramque haecce:

Panax quinquefolium Americ.

P. radice fusiformi simplici vel subramosa perenni; caule herbaceo erecto glabro, foliis quinque ad apicem petioli communis petiolulatis obovato-cuspidatis duplicato serratis glabris; umbellae pedunculo florigerò petiolis breviore; calycis dentibus et petalis obtusis; fructu dispermo.

Panax Pseudo-Ginseng. Wallich.

P. tuberibus fasciculatis; foliis quaternis nunc ternis foliolis quinatis vel ternatis, lanceolatis, caudato-acuminatis, petiolatis, utrinque valde attenuatis, duplicato- et cuspidato-, nunc subinciso-serratis, secus nervos costamque supra cano-setosis; pedunculo terminali, saepissime trifido, petiolos subaequante; floribus hermaproditis; haccis 2—3 spermis.

Ex quo liquet, discrimen intercedere inter plantam Americanam et Nipalensem, et si verum est, quod Breynius, exemplari Americano cum exemplari quodam genuino radicis Coreanae et cum Patris Jartoux descriptione et iconе plantae Coreanae sollicite comparato, invenit, dicens: „nullum mihi remansit dubium, Canadensem plantam Patris Lafiteau esse eandem plane cum Tatarica Patris Jartoux, hancce veram et genuinam esse, quac radicem Ginseng Coreanam præbet.“ Si haec vera sunt rectoque talo stant, planta Sinensis a Nipalensi quoque distaret. Quod discrimen ut vidimus, re vera invenitur; nondum autem liquet Americanam et Sinensem easdem esse. Botanici enim seriores qui hoc contendebant, solas plantas Americanas in descriptionibus suis ante oculos habuisse videntur, quin De Candolle ipse satetur, se non nisi exemplum siccatum Americanum vidisse. Wallich quoque plantam Sinensem non vedit, et in conjectura acquiescit, plantam Nipalensi similem in China inveniri posse, quia coelum utrumque fere aequum sit. Dein, quod infra demonstrabitur, negari nequit rad. Ginseng Americ. a Sinensi distare. Perleb porro et Loureiro de utriusque plantae similitudine dubitant, et Nees ab Esenbeck denique in libro suppleente suo (26) utriusque diversas icones exhibet.

Quodsi igitur certum est veras matres omnium radicum Ginseng et Ninsi varietaes esse Panacis quinquefolii L.

26) 1ster Supplementband. Fasc. 5. Tab. 15.

tamen negare nolumus, radices Sii Ninsi interdum pro radice Ginseng vel Ninsi colligi, cum autores plurimi testentur, hanc plantam in oriente inveniri, ejusque radices, si icones respicimus, quas Nees ab Esenbeck exhibuit (27), radicibus Ginseng genuinis similes esse. Quac hypothesis verosimilior fit, si recordamur testimonio a Thunbergi editi, plantas maxime diversas nomine Tsuru Ninsi vocari, et interdum radices diversissimas pro genuinis habitas esse, ut ex. gr. Tilesii radix, de cuius matre nondum liquet. Nees ab Esenbeck dein refert Panax trifolium L. saepe admixtum inveniri radici Ginseng Americanae. — Eadem igitur ac aliis medicamentis exoticis sors radici Ginseng esset: quodnam enim semper inadulteratum ad nos transportatur?!

Panacis nomen ex Graecorum πάναξ s. πανάκεια derivatur, i. e. planta, quae morbo cuivis medetur, ex quo jam nomine intelligitur quanta vis plantae inesse dicatur. Patria plantae Americanae Canada est ad Tenasseam usque, ubi in montibus altis atque sylvis opacis obsitis invenitur; Parisiis quoque in hortis regiis colitur (28). Graumüllerus testatur, eam apud nos sub dio coeli posse, dummodo radix tegumentis a frigore arceatur, terraque argillosa sit, cuius tertia pars ex arena constet et sole fruiatur; eamque propagari et radice et semine, quod annum unum vel duo in terra

27) Samml. offic. Pflanzen. 7te Lieferung. Taf. 9.

28) Dictionnaire des sciences, Tom 18. P. 102.

jacuisset. Planta orientalis in Nipal, Corea, Japano, Tartaria magna et in Davouria \*) invenitur.

His omnibus non abs re videtur Brey-nii hac de planta sententiam addere. Narrat ille Wormium sine ulla legitima causa Eryngii speciem pro planta materna rad. Ginseng habuisse, et Mentzelium octo diversas plantas exhibuisse: seque ipsum varias plantae icones imo quasdam toto coelo discrepantes vidisse, affirmat. Primum eam genuinam putabat, quae caule gaudet unico geniculato pedali, in plures ramulos foliis ad genicula constanter conjugatis amictos, diviso; foliis laete viridentibus ad Ligustri Germanici accedentibus; floribus ramulorum summitates corona ntibus plerumque ternis, monopetalis in quinque lacinias profunde partitis. Postquam vero ab A. de Jussieu specimen siccum acceperat, tunc demum plantam, quam pro vera habuerat talem non esse, conclusit.

Quod documento sit, quam varia et incerta inde jam ab antiquissimo tempore in radicis nostrae origine definienda scriptores protulerint.

### CAPUT III.

Eandem dispositionem, quam in capite priori plantam maternam describens feci, magna ex parte hic quoque sequi licet.

\*) Neutquam vero in Tauria (Krimm), ut Da Candolle falso scribit.

Sunt enim qui radices duas sejungant, ut ex. gr. Geiger (29):

I. Rad. Ginseng a Panace quinque-folio.

Dicunt recentem crassitudinem digiti, colorem externum griseo-brunneum habere, magnitudinis duorum vel trium pollicum, fere cylindricam, albam atque intus subflavo-punctatam esse, siccando imminui, ita ut amplitudinem pennae anserinae accipiat et rugosa fiat, sursum angulatam deorsum autem saepe besidam esse; recentem odore esse penetrantem et aromatico, cuius exsiccata fere expers sit. Saporem initio subdulcem esse, excitantem, illi rad. Glycyrrhizae similem, postea aromatico - amarum. Radicem olim ex China allatam esse decoraticatam, glabram, subpellucidam, subflavam, corneam, sine odore et sapore mucilagino-so-dulci.

II. Rad. Ninsi a Sio Ninsi.

Hanc in commercio in fragmentis vendi parvis, fusiformibus, quae sursum crassitudinem pennae habeant, deorsum plerumque bipartita essent, colore subfuscō, substantia cornea, pellucida et paullum annulata: praeterea sine odore esse gustuque subdulci. Eam interdum quoque albam esse, haud pellucidam, odore magis aromatico et sapore aromatico - dulci.

Ex qua tamen descriptione mihi quidem difficillimum videtur differentiam essentialē inter utramque radicem invenire. Similem quandam descriptionem Ludovici l. c. exhibet, eo tamen discriminē addito

rad. *Ginseng dulciorem esse.* Concinunt hac cum re descriptiones, quas Martius et Kunze rad. Ninsi et lexicon, quod inscribitur: „Dictionn. des sciences naturelles“ radicis *Ginseng* exhibent. Quod vero rad. *Ginseng* attinet Martius contendit, eam maxime similem esse radici Ninsi. Kunze contra radicis *Ginseng* descriptionem et iconem propositus quae ab omnibus reliquis abhorrent, eamque rad. *Valerianae* similem facit. Quam ob causam Martius (30) recte contendit, Kunzium specimen quod non genuinum esset, habuisse, insuper vero Guibourt, ne haec sola dissensio esset, Martium ipsum genuinum exemplum non habuisse, strenue contendit (31).

Alii auctores, ut Richard, Bohn ceterique unam tantum radicem, *Ginseng* statuunt, eamque Geigeri radicibus similem describunt.

Sunt denique alii, qui plures varietates unius ejusdemque radicis se jungunt ex. gr. Breynius, Graumüller et Nees ab Esenbeck.

Breynius (32) inter rad. *Ginseng coreanam* vel *Sinensem* et *Japonicam* discrimina statuit. Priorem hunc in modum describit: Petroselini similis sed longe minor est, coloris tam externe, quam interne ex flavo albescens, teres, rugosa, compluribus fissuris subtilissimis, fuscis, inprimis

30) l. c. P. 30.

31) Goebels pharmaceut. Waarenkunde fortg. von Kunze. P. 23.

32) l. c. P. 37.

in supremia radice, dense circinnata, et denique uti *Mandragora* plerumque in duos, quos crura diceres, rarius in tres divaricatur ramos. Ejus substantia *Paeoniae* radicibus solidior est. Si transversim dissecatur, circulus in medio apparel resinosus, rufescens. In parte infima saepius aliquantulum diaphana est. Sapore praedita est dulci ad *Glycyrrhizam* vergenti, quamquam longe suaviori, cum levi amaritie et occulta sive leviori vi aromatica linguam blande excalefaciente conjuncta. Odore nullo gaudet. Longitudinem et crassitatem digitii auricularis obtinet. *Japonica* vero circularibus istis lineis paene caret, intus alba et minus solida est, sapore et virtutibus magis destituta.

Graumüller (33) radicem statuit *Ginseng Americanam* et *Sinensem*, utramque vero non nisi per transennam describit.

Nees ab Esenbeck (34) denique quatuor hujus radicis species statuit:

1) *Americanam*.

Hujus superficies partim glabra est, partim perrugosa, colore ex cano flavescente. Transversim dissecta albo reperitur esse colore, qui tamen in vicinio corticis ab annulo excipitur fusco. In cortice puncta reperiuntur flava resinosa. Odor non penetrat, sed subaromaticus est, sapor subdulcis, sed cum acrimonia quadam peculiari et aromatico conjunctus.

2) *Coreensem*

33) l. c. P. 334.

34) 1ster Supplementband. Fasc. 5. Tab. 15. Conspl. 69.

Est napiformis, magis minusve ramosa, et pro aetate crassa. A priori textura in primis secernitur densiori, specie magis cornea, gusto fortiori.

3) Japonicam.

Radix, si vetera sequimur exempla truncum efficit repentem, nodosum, cui adhaerent radiculae napiformes.

4) Napalensem.

Constat ex tuberibus fasciculatis, napiformibus.

Quas descriptiones omnes si comparas, facile credo perspicies, radices has essentialiter diversas non esse, omneque, quod inter eas statuitur discrimen, vel in pelluciditate consistere, vel in densitate vel in dulcedine aut amaritie majori vel minori, vel denique in fibribus circularibus magis minusve excultis.

Neque effectus harum radicum multum differunt. Auctores maxima fide digni Coreanam optimam habent, eoque pretiosorem, quo magis color et pelluciditas electro et figura homini similes reperiuntur. Japonica et Americana minoris habentur, quarum posterior fere sola in Europa nota et in usu erat, cujusque teste Bohnio l. c., bifidae et albae optimae sunt. Americana Sinensi saepe admiscetur, et interdum inter rad. Serpentariae et Senegae invenitur.

Regio, in qua rad. Ginseng Sinensis crescit, perpetuo ab exercitu circumdatur, quod in tentoriis castra ibi tenet, messisque tempore milites radicum colligendarum gratia emitit. Optimum effodiendi

tempus quartus et octavus anni Sinensis mensis censetur esse, quo tempore foliis et caule amissis planta noctu fulgorem quendam edere dicitur ejus ope a quaerentibus inveniri et effodi potest, quod cultro ex arundine bamboes facto perficitar (35).

Tractatio, quae dein insequitur, radicis ab aliis aliter describitur; illa autem verissimilla videtur, quam Burrow refert, cum plurimi autores cum eodem consentiant, eamque ipsam a Mandarino quodam audierat, et pelluciditas et durities radicis eam tueantur. Radix enim diligenter lota in aquam bullientem mergitur et denique sollicitate siccatur. Dein supra forniciem calore miti exsiccatur, donec elastica fiat. Denique in cistas radices conduntur plumbo vestitas, quae aliis majoribus immittuntur; spatium vero quod inter has cistas manet, calce viva expletur, ut insectae arceantur.

Quod vero chemicam radicis analysis attinet, Richard eam ex amylo et gummi constare putat. Geiger oleum aethereum, principium saccharinum et extractivum amarum in ea praedominare asserit. Büchner (36) haec habet: „Principiis gaudet salinis subtilioribus, sulphureis, gummoso-resinosis cum teneribus mucilaginosis remixtis.“ Quae autem cuncta non nisi hypotheses sunt, cum chemica ejus analysis teste Kunzio et Neesio ab Esenbeck nondum hucusque instituta sit.

Huic capiti descriptionem addo accurata-

35) Breynius l. c. P. 58.

36) Büchær, A. E. Fundamenta materiae medicæ. Halae 1754. P. 251.

tam rad. **Ginseng genuinae Sinensis**, quam Professor cl. Ledeboura Dre. Kruhse, qui Irkutzki habitat, e China accep-  
rat, et collegae suo cl. Erdmanno tradiderat.

Duo fragmenta sunt, majus pollicis fe-  
re unius longitudine et crassitudine pennae  
cornicis, rubida, dura ut Salep, fere pellu-  
cida, extrinsecus rugis longitudinalibus te-  
cta, quae sine certo ordine se invicem ex-  
cipiunt, ubi abscissa sunt laevia et nite-  
scentia, in quaque parte similis consisten-  
tiae et texturae. Sunt sine odore, sapore  
subdulci-aero, rad. Glycyrrhizae simili et  
simil mucilaginoso. Radix diutius mandu-  
cata in ore resolvitur.

Non est, quod addam, descriptiones Gei-  
geri, Breynii et Neesii ab Esenbeck  
magis minusve cum mea concinere, eamque  
ob causam dubium quodvis, num radix haec  
genuina sit, nec ne, evanescere.

#### C A P U T IV.

In hac opusculi mei parte vim et ef-  
fectum rad. **Ginseng** pertractabo, remedii,  
quod perraro et a nonnullis tantum medicis  
europaeis et ab his obiter investigatum est,  
remedii, de quo narrationes fabulosae e  
terra fabulosa ab interpretibus formulæ chri-  
stianæ apud paganos et mercatoribus avari-  
s ad nos devenerunt. Quodsi autem vis  
atque effectus opii, camphorae aliorumquo  
medicamentorum nobis nondum innotue-  
runt, quae quotidie a medicis adhibita vide-  
mus, nonne de radicis nostræ vi ac effe-  
ctibus scripturus Sisyphi laborem suscep-  
denuo denuoque incipiendum? Quod quan-

tum fieri potest, vitaturus, primum quae-  
ram, qua via effectus medicamenti cujusdam  
generaliter nobis innotescant? Quod expe-  
rientia fit et meditatione; experientia enim  
edocemur medicamentum quoddam morbos  
quosdam frangere; ejusque effectibus recte  
perpensis atque inter se comparatis gene-  
ralem quandam ejus vim statuere possumus.  
E contrario autem ex constituentibus medi-  
camenti partibus, quinam ejus effectus fu-  
turi sint conjicere possumus, saepaque ex-  
perientia huic praejudicatae sententiae re-  
spondet. Quod in primis de effectu generali  
medicamenti cujusdam minus autem de ejus  
effectibus specificis valet. Quam ob cau-  
sam ex sapore amaro Quassiae ei vim to-  
nicam, ex sapore aromatico Valerianaæ ei  
vim excitantem inesse conjicere licet. Quis  
vero unquam, nisi experientia duce, defini-  
tum ivisset, Ipecacuanham vomitum et Sem.  
Colocynthidum diarrhoeam procreare?

Quod vero radicem nostram attinet,  
certi quid de ejus vi ac potestate proferre, dif-  
ficillimum est, cum ejus vires a Sinensibus  
laudatae, et a medicorum recentiorum relationibus,  
quae non magnos effectus ei ad-  
scribunt discrepant, et contra ejus indolem  
objectivam pugnare videantur. Qua re va-  
ria hac de re judicia referam, a veteribus  
de hac radice testibus exordiens.

Dr. Gohlius anno 1643 ex Japone de  
radicis hujus vi haec retulit: „Sanguinem  
aquosum et tenuem mundificat ac restituit  
in debitam consistentiam. Palpitationibus  
cordis et furiosis animi affectibus medetur.  
Corrigit quaecunque aliorum medicamento-

rum vitta et defectus. Exhilarat spiritus cor et animum; vitam prolongat et conservat magis, quam ulla alia medicina. Cerebrum et memoriam confortat, caligines oculorum discutit, omnia mala quin et illa, quae ex nimia Venere exorta tollit. Sanguinem adauget, corporis lassitudines spontaneas adimit, melancholiam corrigit, appetitum excitat, sudores promovet, vertigines et obtemperaciones visus tollit. Prodest syncopeticis, lithothymicis, paralyticis, applecticis, convulsis, epilepticis, stupori et contractioni nervorum etc., stomachicis item hepaticis et pneumonicis. Cutem mollem ac delicatam reddit, retorridam corporis siccitatem depellit, stomachum cibis repletum exinanit, vomitum compescit, phlegmaticos morbos sanat, febres domat ut et stranguriam; sputum sanguinis sistit, ut et dejectiones alvi cruentas, parturientes roborat, tum in ipso partu, tum post partum. In summa pro summo habetur remedio ad curandos et praeservandos omnis generis morbos.“

Sed jam Breynius ipse (37) haec nimis jactitanter prolata esse et circumforaneum potius quam medicum sapere concedit. Radicis vero Ginseng virtutes multiplicibus experimentis a Deckersio tunc temporis medicinae Lugduni Bat. professore, institutis, in Europa probatas esse contendit hasce: 1) primam concoctionem eam promovere, ventriculi imbecillitati medendo, praesertim e virium penuria ac temperie frigida oriundae, medendo, quo in casu commode conjungatur cum Aniso stel-

37) I. c. P. 39.

late 2) cardiaeum esse nunquam satis laudandum, vires enim conservare, amissas restaurare, spiritus animales augendo; hinc que optimo cum successu a Freder. Deckersio in parte difficili, syncope, cordis palpitatione vel in substantia vel in tinturae forma cum aqua Cinnamomi aliave exhibita esse. In hominibus, morbis vel acutioribus vel chronicis valde debilitatis, nullum huic aequiparandum esse medicamentum. Febrem tollere. 3) nervis mirifice conduce-re, hincque tintura vel extractum ejus cum spiritu vini rectificat. paratum aptum esse remedium in colica passione, in primis si cum lipothymia conjuncta sit, et in paralysi ex colica, in primis in regionibus frigidioribus; summo cum successu etiam exhiberi in convolutionibus, vertagine etc. infan-tium a gr. vj usque ad 3β in substantia, in adultis ad 3β 4) ad Venerem magis quam ullum aliud medicamentum utrumque stimu-lare sexum calorem naturalem augendo, spiritus animales ac seminis secretio-nem promovendo, hinc sterilitatem et im-potentiam virilem praesertim quae ex spirituum seminisque defectu prodeant, tollere. Coitus quoque voluptatem augere et penis erectionem stimulare, in primis si vagina et labia mulierum ante oestrum Balsamo de Meca inungantur \*). Hinc fieri, quod Si-nensis Magnates vix ullo pharmaco quod hanc radicem non recipiat, utantur; 5) omnes viscerum obstructiones tollere, sanguinem tenacem attenuare: quid multa! sum-mum esse πολύχρηστον. Juvenes vero qui

\*) Quod de Turcarum imperatore narratur.

temperamento sunt bilioso ab ejus usu prohibendos esse.

Deckers, narrante Breynio, Civitatis Consulari eidam horrendis et frequentioribus motibus convulsivis vexato rad. Nisi 3j primum porexisse, qua sumta non modo illos mox minores breveque solutos observavisse, verum etiam aegrotum sex horis post, eadem dosi iterata, a cruciatu prorsus liberatum esse.

Jartoux (38) quoque maxima ex parte vires, quas modo retuli, rad. Ginseng enumerat, additque Mandarinos Sinenses raro mori radice hac non sumta, saepeque ex agonia maxima ad vitam revocari. Narrat praeterea, se ipsum hanc radicis vim in Sina expertum esse, cum laboribus pressus ita debilitatus esset, ut in equo sustentari non posset; dimidia autem rad. Ginseng parte sumta vires ejus ita auctas fuisse, ut maximae virium intentioni rursus par esset. Graumüller l. c. praeterea refert, eam a Francogallis contra affectiones asthmaticas adhiberi, cardiaci et emenagogi loco; et Kunzio et Geigero testibus in America septentrionali contra febrem intermittentem corticis Chine loco adhibetur.

Formula, qua datur, variat. Apud Sinenses et Japanos decocta porriguntur; in Europa autem magis in substantia a gr. vj ad gr. xxx usque vel in infuso ad 3jj usque in colaturaे 3vj adhibetur.

Haec sunt quae experientiam docuisse contendunt. Quae cuncta si recte sese ha-

38) Dictionnaire des sciences naturelles. Tom 18.  
P. 301.

bent, dicendum est, radicem nostram Ginseng vires medicamenti tonici, antispasmodici et excitantis maxime possidere, eamque solum corticis Chine, Oppii et Moschi loco adhiberi posse, ejusque vim specificam in genitalia excitanda et roboranda majorem esse quam cantharidum, neque tamen harum secum ferre damna, et optimum igitur aphrodisiacum esse.

Hisce vero laudibus niniis qui viam certam sequuntur et rationem in arte medica exercenda, sine dubio diffident. Quae dubia, si nulla alia, hac causa in primis moventur quod medicamina cetera (iis quae mineralibus adnumerantur, exceptis) si majorem vim habeant, hanc et sapore et odore iudicant. Rad. Ginseng contra partibus potius indifferentibus componi videtur quae eandem fere vim ac rad. Liquiritiae ei impertiunt, cuius loco in America saepe adhiberi dicitur. Vires autem specificae quibus gaudeat, hac via, nempe gustu et olfactu, quod jam dixi, detegi nequeunt. Fortasse vim aphrodisiacam laudatam continent, at ne hoc quidem certum est: scimus enim aliorum quoque medicaminum, ex. gr. Stinci marini, vim aphrodisiacam ab orientalibus, eusmodi remediorum studiosis, maxime laudatam esse; quamvis constat Stincum marinum remedium indifferentissimum esse.

Quam variarum sententiarum farraginem, doctorumque de vi radicis Ginseng dissensionem certo quodam testimonio in ordinem redigere et componere mihi non

contigit, cum nec chemicam ejus analysis instituere, neque experiendo ejus vires medicas explorare potuerim. Quam ab eausam optandum est, ut radix haecce diligenti subjiciatur examini, quod in Rossia nostra in primis fieri potest, in qua eam sibi parare facilius est. Utinam literae et genus humanum magnum ex hoc aliquando commodum capiant!

---

Nota. Hoc quolicunque opusculo jam absoluto libros evolvere contigit, quos omni data opera antea non acceperam. Quos autem non magis, quam ceteri, inter se concinere video. Nam Kühn (in lex. medic. Steph. Blancardi emend. C. G. Kühn. Vol. I. Lips. 1832) R. Ginseng a Panace quinquefolio secernit, et R. Ninsi a Sisaro montano Coreensi se jungit. Geigerus contra in opere suo novissimo (in Pharmacopaea universalis, Heidelb. 1835. Parte I. P. 245) solam R. Ginseng statuit a Panace quinquefolio.

---

#### THESES.

- 1) Inflammatio et reproductio non nisi gradu inter se differunt.
  - 2) Asthma Millari, tussis convulsiva et cynanche trachealis ad eandem morborum speciem referenda sunt.
  - 3) Nego, causam proximam febrium esse conamen naturae mortem avertere tendens.
-